

Kõkõbì ãlu ni Yūwánī ní sī rī Tã búkũ rī vé rī ã ũlũngará

Yūwánī Yēsũ vé 'bá áyúâyũ rī sī kőkõbì 'dĩri 'bá urukọ adri 'bá Kūrīsītīyánī rú rī pi ní, lě kọpi sũ anji ívé ni tịnị. Kīnī, lě kọpivé ãsám vú Múngú be rī, ãzini Kúrísítõ be rī ã adri múké. 'Yo kọpi ní 'bá ãngũ ímbá 'bá kánísã agá ũnjõ sī rī pi vé tã. Yūwánī kīnī, ọtụ í rikí adrií Yēsũ be trụ, 'í nị rá, Yēsũ ri 'bá áda, ãri Mvã Múngú vé ni. Kīnī, kọpi 'bãkí dõ é sị Yēsũ drìgè rá, kọpi ídri 'dání 'dání rī ísú rá. Kīnī, kọpi Kūrīsītīyánī rú, lě kọpi ã lěkí Múngú ri lě lě, ãzini kọpi ã lěkí í lě lě í ãsám vú gé sī.

'Bá ídri sēepi rī

¹ Í'dóngará gá 'dãá, Ụ'dúkọ ídri sēepi rī, ãri anigé, 'bá yìkí ãrivé ụ'dúkọ rá, 'bá ndrekí ãri 'bã mị sī rá, 'bá úlókí rụ 'bã ni 'bã drị sī rá, 'bã ní rii tã ni ũlũú ãmi ní 'dĩ.

² 'Bã ídri sēepi rī i 'da 'i 'bã ní rá! 'Bã ndrekí ãri 'bã mị sī rá. 'Bã nóni ri ídri 'dání 'dání ọtụ adriípi Ẹtẹpi Múngú be trụ í ní i 'daá 'bã ní rī vé tã ũlũú ãmi ní.

³ 'Bã ri ãmi ní tã 'bã ní ndreé 'bã mị sī, ãzini 'bã ní yị 'bã bì sī rī ũlũ, 'bã úmúkí rí 'bã adrií ãmi be trụ, ãzini 'bã úmúkí rí 'bã adrií Ẹtẹpi be trụ, ãzini Mvọpi Yēsũ Kúrísítõ be trụ.

4 'Bá sīkí tã 'dĩ'bée sēé ĩmi ní, 'bâ úmúkí rí 'bâ adrií ĩmi be trų, 'bâ adrikí rí ĩmi be äyĩkõ sī.

Múngú ri dī sū ũtúná tịnị

5 Ủ'dúkọ 'dĩri 'bá yíkí íngázú Yésũ vúgá, 'bá ní rií ũlũú ĩmi ní 'dĩ kìnĩ, Múngú ri dī ängũ íngbērē sū ũtúná tịnị, tã äzi índrēpi sū ìnịná tịnị rụ' 'bá ni gé 'dǎáyo.

6 'Bá 'yokí dō kìnĩ, 'bá ícíkí 'bâ äsámvú Múngú be rī ícá ngá älu gí, 'bo 'bá áwíkí dō adrií ìnịná agá rií ũnjĩkányā 'oó, 'dĩri lū 'yozú kìnĩ, 'bâ ũnjó rú, tã 'bá ní 'oó rī adri tã áda ku.

7 'Bo 'bâ dō ri adri ũtúná agá, sū Múngú ní dī ũtúná rú rī tịnị, 'bá 'bâ úmú adri 'bá Múngú vé rī pi be trų. Múngú Mvópị Yésũ vé äri, ĩri 'bávé ũnjĩkányā ũjĩ 'bâ rụ' 'bá gá sī céré.

8 'Bá 'yokí dō kìnĩ, 'bâ ũnjĩkányā äkó, 'bâ ri 'bâ mị ũ'bã, tã áda 'bá éşị agá 'dǎáyo.

9 'Bá ũlũkí dō 'bávé ũnjĩkányā Múngú ëndrētị gé rá, Múngú ri éşị 'bã tã pịrị 'ozú, ĩri 'bâ trũ 'bávé ũnjĩkányā agásĩ rá, äzini ĩri 'bávé ũnjĩkányā ũjĩ rá.

10 'Bá 'yokí dō kìnĩ, 'bâ ũnjĩkányā äkó, 'dĩri lū 'yozú kìnĩ, 'bâ ri 'yo, Múngú ri ũnjó rú, ĩrivé ú'dúkọ múké 'dĩri 'bá éşị agá 'dǎáyo.

2

1 Má anjị rī, á sī kőkõbị 'dĩri sēé ĩmi ní, ĩmi 'okí rí ũnjĩkányā ku. 'Bo 'bá rī 'o dō ũnjĩkányā, 'bá äzi pá tuúpi 'bávé tã tị gé átápi Ètépị be ni anigé, 'bá rī Yésũ Kúrísítõ adriípi pịrị rī 'i.

2 Yēsū Kúrísitō adi 'i sēé drāá 'bávé ũnjikānyā ũjizú 'bâ rú' 'bá gá sī, ũjī 'yéná 'bávé ũnjikānyā ọ'dụkụlẹ ku, ĩri 'bá vū drīgẹ rī pi vé ũnjikānyā ũjī céré.

3 'Bá 'dukí dō tǎimbị Múngú vé rī ngaá rá, 'bâ ícọ nī áamá 'yozú kínī, ádarú 'bá nīkí Múngú ri rá.

4 'Bá rī 'yo dō kīnī, 'í nī Múngú ri rá, 'bo 'dụ dō tǎimbị Múngú ní ẹzị rī ngaá kuyé, 'bá 'dīri ũnjó rú, nī tǎ áda Múngú ní ẹzị rī kuyé.

5 'Bo 'bá 'dukí dō tǎ Múngú ní ẹzị rī ngaá rá, tǎ 'dīri lū 'yozú kínī, ádarú 'bākí lēngará Múngú vé rī adrií 'bá ẹsị agá gí. Kúru 'bâ ícọ nī áamá 'yozú kínī, 'bávé ǎsámvú Múngú be rī ícá múké gí.

6 'Bá rī 'yo dō kīnī, 'i 'bá Múngú vé ni, lē ǎ 'o tǎ rī, sū Yēsū ní 'oó rī tịni.

Tǎimbị ú'dí rī

7 ĩmi mávé ũndī má ní lēlē rī pi, tǎ má ní sī sēé ĩmi ní 'dīri adri tǎimbị ú'dí ni kuyé, ĩri tǎimbị ụkụ ĩ ní ọtụ sēé ĩmi ní, ĩmi ní Yēsū ri ẹ'yīzú rī gé 'dāri. Tǎimbị ĩ ní 'yoó kínī, lē ǎ lēkí 'bá lēlē 'dīri, ĩri tǎimbị ĩmi ní ọtụ yị drīdrī 'dāri.

8 'Bo tǎ má ní sī sēé ĩmi ní rī, ĩri ádarú tǎimbị ú'dí ni, Yēsū vé tǎ 'oó rī lū 'yozú kínī, lē kpá ǎ ndrekí tǎ áda tǎimbị rī vé rī ĩmī rú' 'bá gá, ǎ'diātāsīyā tǎ 'oó ĩnịná agá rī ǎ vúgú de 'i gí, ụttúná ri nóni ri ka nī.

9 'Bá rī 'yo dō kínī, 'i ụttúná agá, 'bo 'bā dō ẹsị ũnjí ọgúpị ní, áwí 'dīri adrií kuú ĩnịná agá.

10 'Bá 'í ẹdrípị ri lēepi lēlē rī, ĩri 'bá adriipi ụttúná agá ni, ngá ǎzi ĩri ẹsị agá sēepi ĩri ní tǎ ũnjí 'ozú ni 'dǎáyo.

11 'Bo 'bá ẹ̀sì ùnjí 'bǎápi 'í ẹ̀drípì ní rĩ, ịri drĩ kú ịnị́nà agá ùgògò, ịri ri ẹ̀cị́ tẹ́ ịnị́nà agá, nị́ kuyé 'i dō ri mụ́ ngòlé, ǎ'diātāsīyǎ ịnị́nà ọ̀zụ́ mị́ ni gí.

12 Ịmi mávé anji má ní lèélè rĩ pi, á sī tǎ 'dĩri sèé ịmi ní,
ǎ'diātāsīyǎ Múngú trũ ịmi ùnjìkǎnyǎ agásí
gí Yésù ǎ rú sī.

13 Ịmi má ẹ̀tẹ̀pị́, á sī tǎ 'dĩri sèé ịmi ní,
ǎ'diātāsīyǎ ịmi nị́kí Kúrísítō adriípi
í'dóngará gá 'dǎlé anigé rĩ gí.

Ịmi kẹ̀rìanji rĩ pi, á sī tǎ 'dĩri sèé ịmi ní,
ǎ'diātāsīyǎ ịmi ndẹ́kí ǎdróko ri gí.

Ịmi mávé anji má ní lèélè rĩ pi, á sī tǎ 'dĩri sèé ịmi ní,
ǎ'diātāsīyǎ ịmi nị́kí 'bá Ẹ̀tẹ̀pì Múngú ri gí.

14 Ịmi anji Múngú vé rĩ pi, á sī tǎ 'dĩri sèé ịmi ní,
ǎ'diātāsīyǎ ịmi nị́kí 'bá Ẹ̀tẹ̀pì Múngú ri gí.

Ịmi má ẹ̀tẹ̀pị́, á sī tǎ 'dĩri sèé ịmi ní,
ǎ'diātāsīyǎ ịmi nị́kí Kúrísítō adriípi
í'dóngará gá 'dǎlé anigé rĩ gí.

Ịmi kẹ̀rìanji rĩ pi, á sī tǎ 'dĩri sèé ịmi ní,
ǎ'diātāsīyǎ ú'dúkọ́ Múngú vé fiípi ịmí ẹ̀sì agá
rĩ
sè ịmi tukí pá ùkpó ùkpó ịmivé ẹ̀'yìngará
agá,
sè ịmi ndẹ́kí ǎdróko ri gí.

ǎ 'bǎkí ẹ̀sì tǎ nyọ̀ọ̀kú nōri vé rĩ drìgè ku

15 Lè ịmi 'bǎkí ẹ̀sì tǎ nyọ̀ọ̀kú nōri vé rĩ drìgè ku,
dōku lè ịmi fikí ùnjìkǎnyǎ nyọ̀ọ̀kú nōri vé rĩ 'oó
ku. 'Bá rĩ 'bǎ dō ẹ̀sì tǎ nyọ̀ọ̀kú nōri vé rĩ drìgè,
íco ẹ̀sì 'bǎá 'bá Ẹ̀tẹ̀pì ri lèzú ku.

16 Tã nyõõkú nõri vé rĩ, ĩri sê 'bá rĩ tã rú' 'bá nõri vé rĩ 'du nga áyu, sê ĩri ẹsị 'bã ãmbúgú ngá drìgé, ĩri adri ãfú rú. Tã 'dĩ'bée adrikí tã 'bá Ẹtẹpi ní lēē ã 'okí rĩ kuyé, tã 'dĩ'bée tã nyõõkú nõri vé ni.

17 Tã nyõõkú nõri vé rĩ, ãzini ẹsị 'bá rĩ pi ní rií 'bãá ngá nyõõkú nõri vé rĩ pi drìgé rĩ, ĩri ímú de rá. 'Bo 'bá Múngú vé tã 'duúpi ngaapi rĩ, ĩri ídri 'dáni'dáni rĩ ịsú rá.

Ari'ba Yẹsũ Kúrísítõ vé rĩ pi

18 Mâ anji rĩ, ụ'dụ ụdũ vé rĩ ícá gí. ĩmi yíkí ĩmí bí sĩ rá kíní, ãrí'bágú Kúrísítõ vé rĩ ri ímú 'dĩ'dĩ, nóni ari'ba Kúrísítõ vé rĩ pi ícákí kárakará gí. Sê 'bá nńkí áamá ãní 'yozú kíní, ụ'dụ ụdũ vé rĩ ícá gí.

19 Ari'ba 'dĩ'bée, kọpi fũkí 'bá ãsámvú gé nōósĩ, kọpi ẹ'yĩkí Yẹsũ ri sũ 'bá ní ẹ'yĩ rĩ tịni kuyé. Kọpi ẹ'yĩkí té dō Yẹsũ ri sũ 'bá ní ẹ'yĩ rĩ tịni rá, kọpi té áwí adri 'bá be trụ. Kọpivé fũngará 'bá ãsámvú gé sĩ 'dĩri lũ 'yozú kíní, kọpi ẹ'yĩkí Yẹsũ ri sũ 'bá ní ẹ'yĩ rĩ tịni kuyé.

20 'Bo Yẹsũ ri Uletere, sê ívé Índrí Uletere rĩ ású ĩmi gí, sê nóni ĩmi nńkí tã áda Múngú vé rĩ gí.

21 Á sĩ ĩmi ní kọkọbị 'dĩri sēē 'yozú kíní ĩmi nńkí tã áda rĩ kuyé yã 'dĩni ku, ĩmi nńkí tã áda rĩ rá, ã'diātāsīyā tã áda Múngú ní i'daá rĩ agá, ãnjõ 'dãáyo.

22 'Bá ãnjó rú rĩ ã'di 'i? 'Bá ãnjó rú rĩ, ĩri 'bá 'yoópi Yẹsũ adri Kúrísítõ ku rĩ 'i. 'Bá 'dĩni 'dĩri, ĩri ãrí'bá Kúrísítõ vé ni, 'bá 'dĩri gã Ẹtẹpi Múngú rĩ sĩ, ãzini gã Mvọpi Yẹsũ rĩ sĩ.

23 'Bá Mvópi Yésũ ri gãapi sĩ rĩ, gã kpá Ẹtẹpi Múngú ri sĩ, 'bá Mvópi Yésũ ri ǎ'yĩpi rá rĩ, ǎ'yĩ kpá Ẹtẹpi Múngú ri rá.

24 Kúru ú'dúkó múké ì ní ímbá ìmi ní í'dóngará gá 'dǎá, ìmi ní yij ìmî bí sĩ 'dĩri, lě ìmi 'bǎkí kuú ìmî ẹsị agá. Ìmi 'bǎkí dō tā ni ìmî ẹsị agá rá, ìmi áwí adri ìmi Ẹtẹpi Múngú agá, ǎzini Mvópi Yésũ agá.

25 'Bá áwíkí dō adrií Múngú agá, 'bá ícọ ídri 'dáni'dáni Kúrísítō ní ẹziji rĩ ịsú rá.

26 Á sĩ tā 'dĩri sěé ìmi ní, ìmi ǎ adrikí rí mị be kowu 'bá lě'bá ìmî mị ũ'bǎ'bá 'dĩ'bée vé tā sĩ.

27 'Bo nóni Kúrísítō sě Índrí Uletere rĩ ású ìmi gí, ìri nóni ri adri ìmi agá, ìmi gōkí nóni ímbángará lěé dji ku, Índrí Uletere rĩ ìmi ímbá nĩ. Tā ìri ní ímbá rĩ adri ũnjō ku, ìri tā áda. Nóni lě Índrí Uletere rĩ ǎ ású ìmi, lě ìmi áwíkí ìmi ịkpǎá adrií Kúrísítō ǎ rụ'bá gá, sũ Índrí Uletere rĩ ní ìmi ímbá rĩ tịni.

Anji Múngú vé rĩ pi

28 Má anji rĩ, lě ìmi áwíkí ìmi ịkpǎá adrií Kúrísítō ǎ rụ'bá gá, Kúrísítō kǎdō ímví ịgōó, 'bá ícókí adrií ịrĩ sĩ ku, ǎzini 'bá ícókí adrií drĩnjá sĩ ku ìri ẹndrẹti gé.

29 Ìmi nĩkí rá 'yozú kínĩ, Kúrísítō ri tā be pịri, ìmi nĩkí kpá rá 'yozú kínĩ, 'bá tā 'oópi pịri rĩ, ìri adri Mvǎ Múngú vé ni.

3

¹ 'Bá Ẹtẹ̀pì Múngú lě 'bâ ambamba, ì ní 'bâ zìzú ãní Múngú vé anji 'dĩ. Ádarú 'bâ anji Múngú vé ni. Tã 'bá nyọ̀okú nōri drìgẹ̀ rĩ pi ní 'bâ n̄zú ámázú kuyé 'yozú kínĩ, 'bâ anji Múngú vé ni rĩ, kọ̀pi n̄kí Múngú ri kuyé.

² Ẹ̀mi mávé ùndĩ má ní lěélě rĩ pi, 'bâ nóni anji Múngú vé ni, Múngú ri dō úmvúlésĩ ímú 'bâ újá adri íngóni yã, i'da drĩ 'bá ní tã ni kuyé. 'Bo 'bá n̄kí rá 'yozú kínĩ, Kúrísítō kādō ímvi ìgōó, 'bâ ìri ndre rá, 'bâ ímú adri sũ ìri t̄n̄jì.

³ 'Bá ẹ̀sì 'bãápi Kúrísítō drìgẹ̀ rĩ, ìri adri ule, fi ùnjìkãnyã 'oó ku, sũ Kúrísítō ní adrií ule ùnjìkãnyã àkó rĩ t̄n̄jì.

⁴ 'Bá ùnjìkãnyã 'oópi rĩ, ñō tãìmbì Múngú vé rĩ gí. Ùnjìkãnyã ri, ìri Múngú vé tãìmbì ñōngará.

⁵ Ẹ̀mi n̄kí rá 'yozú kínĩ, Yẹ̀sũ ímú 'bávẹ̀ ùnjìkãnyã ùjìí 'bâ rù'bá gá s̄i gí. Yẹ̀sũ 'o ùnjìkãnyã àluṅáni kuyé.

⁶ 'Bá rĩ ìkpã dō 'i kú rù'bá ni gé, ícọ̀ ùnjìkãnyã 'oó d̄j̄j̄ d̄j̄j̄ ku. 'Bá rĩ dō ri ùnjìkãnyã 'o mụzú, 'bá 'd̄iri n̄j̄ ìri kuyé, áamá ìri kuyé.

⁷ M̄a anji rĩ, lě ìmi s̄ékí 'bá àzi ã ù'bã ìm̄i m̄i ku. 'Bá tã 'oópi p̄ìr̄i rĩ, Múngú ẹ̀ndrẹ̀t̄i gé, ìri 'bá p̄ìr̄i, sũ Kúrísítō ní adrií p̄ìr̄i rĩ t̄n̄jì.

⁸ 'Bá riípi ùnjìkãnyã 'oópi rĩ, ìri 'bá àdróko vé ni, ã'diātāsīyã àdróko í'dó ùnjìkãnyã 'oó ì ní drĩ 'bù pi gbizú vū be kuyé rĩ gé 'd̄áá, 'bo Mvã Múngú vé rĩ ímú ẹ̀z̄i àdróko vé rĩ izaá dr̄i ni gé s̄i rá.

⁹ Anji Múngú vé rĩ pi ícókí rií ùnjìkãnyã 'oó ku, ã'diātāsīyã úri Múngú vé rĩ adri kọ̀pi ẹ̀sì agá. S̄e

kôpi 'okí ũnjikānyā ku, ã'diātāsīyā Múngú 'du kôpi 'bāá anji ívé ni pi rú gí.

10 'Bā anji Múngú vé rī pi nī á má rá, 'bā kpá anji ādróko vé tā 'du'bá nga'bá rī pi nī á má rá, ã'diātāsīyā 'bá tā 'oópi pīrī ku, 'í ọ́gúpī ri lēépi ku rī, adri mvá Múngú vé ni ku.

Lē 'bā lēkí 'bā lēlē

11 Ụ'dúkọ múké Múngú vé ĩmi ní yìí 'dóngará gá 'dāá rī lū kínī, lē 'bā lēkí 'bā lēlē.

12 Lē 'bā adrikí sū Káyīnā ándúru rīpi ādróko vé tā 'oópi édrípī ri 'dīpī drāápi rī tīnī ku. Káyīnā 'dī édrípī ri āsī? Káyīnā 'dī édrípī ri, édrípī ní tā 'oó Múngú ẹndrẹtī gé pīrī rī sī, 'bo tā Káyīnā ní 'oó rī Múngú ẹndrẹtī gé ũnjí.

13 Má édrípījí má ọ́mvúpījí, 'bá nyọ́okú drīgé nōgó rī pi ndrekí dō ĩmi ũnjí, ĩmī ẹsị ā tī ǎní ku.

14 'Bá lēkí dō 'bā lēlē, ĩri lū 'yozú kínī, 'bá ĩfúkí drā agásí gí, 'bá ịsúkí ídri 'dání'dání rī gí. 'Bá édrípī ri lēépi ku, āzini ọ́mvúpī ri lēépi ku rī, ĩrivé ındrī áwí drāá kuú ǎvū rú.

15 'Bá ẹsị ũnjí 'bāápi ọ́gúpī Yẹsū ri ẹ'yīpī gí rī ní rī, ĩri 'bá rīpi ǎngū ú'dípī ni. ĩmi nǎkí rá 'bá ǎngū ú'dípī rī, ịsú ídri 'dání'dání rī ku.

16 Lēngará vé tā, ĩri 'díní, Yẹsū Kúrísítō adi 'i sēé drāá 'bā tā sī. Lē 'bā adikí 'bā sēé drāá 'bá ọ́gúpījí Yẹsū ri ẹ'yī' 'bá gí rī pi vé tā sī, sū Yẹsū ní 'i adíí sēé drāá rī tīnī.

17 'Bá rī dō ngá be, ndre dō ọ́gúpī ri ngá ǎkó, ko dō ọ́gúpī ẹ ĩzā ngá sī ku, lēngará Múngú ní 'bá rī pi lēzú rī ẹsị ni agá 'dāáyo.

18 Má anji rĩ, ã lěkí ãngũ tị sĩ kána ku, ádarú lě ĩmi lěkí ĩmi ọgũpịj lělē, ĩmi kokí kọpi ē ĩzã ngá sĩ koko.

19 'Bá lěkí dō 'bá ọgũpịj lělē, 'bâ ícọ nĩ ámá 'yozú kínĩ, 'bâ ri tã áda 'o, ĩri sē 'bâ ẹsị ri adri ǎyĩkō sĩ, 'bá kādō rií Múngú vé tã ụsụ.

20 'Bâ ẹsị ã ri dō ọó ụnjĩkányã 'bá ní 'oó rĩ sĩ drããsĩyã, Múngú ri ǎmbúgú, nĩ tã 'bá ẹsị agá rĩ cére rá, tã ǎzi Múngú ní nị kuyé ni ǎlunani 'dǎáyo.

21 ĩmi mávé ụndĩ má ní lělē rĩ pi, 'bá ámákí dō 'yozú kínĩ, 'bá 'okí ụnjĩkányã kuyé, 'bâ adri Múngú ẹndrẹtị gé ụrĩ ǎkó.

22 'Bá zíkí dō ngá Múngú tị gé, ĩri sē 'bá ní rá, ǎ'diātāsĩyã 'bâ ri tã ĩri ní ẹzị 'bá ní rĩ 'du nga rá, ǎzini tã 'bá ní 'oó rĩ, ĩri Múngú ní ǎyĩkō sē.

23 Múngú ẹzị 'bá ní 'díní kínĩ, 'bâ ẹ'yĩkí 'i Mvọpị Yẹsụ Kúrísítō ri, ǎzini 'bâ lěkí 'bâ lělē 'bâ ǎsámvú gé sĩ, sụ Yẹsụ ní ẹzị rĩ tịni.

24 'Bá tǎimbị Múngú vé rĩ 'du 'bá nga 'bá rá rĩ pi, kọpi úmúkí ĩ adrií Múngú be trụ gí, Múngú ri adri kọpi be trụ. Tã 'bá ní nịzú ámázú 'yozú kínĩ, Múngú ri adri 'bá be trụ rĩ, ĩri ní Índrí Uleteré rĩ ịpěé 'bâ ású rĩ sĩ.

4

Lě ĩmi ámákí índrí rĩ pi ámámã

1 ĩmi mávé ụndĩ má ní lělē rĩ pi, lě ĩmi ẹ'yĩkí índrí rĩ pi vé tã mụzú bādārú ku. Lě ĩmi ámákí índrí rĩ pi ámámã, índrí rĩ pi dō Múngú vé ni, dō kọpi índrí ǎzi túngú ni pi. ǎ'diātāsĩyã nẹbị ụnjó

rú rĩ pi kárakará, kôpi ayikí mužú vũ drĩgé sĩ, kôpi rĩ tã ũnjõ vé ni pi ũlũ mužú 'bá rĩ pi ní.

² Tã ĩmi ní ícózú Índrí Uleteré Múngú vé rĩ nĩzú ámázú rĩ, ĩri 'dĩni, nẹbĩ 'yoópi kĩnĩ, tĩkĩ Yẹsũ Kúrísítõ ri ĩfũú 'bá áda rú rĩ, nẹbĩ 'dĩri índrí Múngú vé rĩ rụ' 'bá ni gé anigé.

³ 'Bo nẹbĩ 'yoópi kĩnĩ, tĩkĩ Yẹsũ ri 'bá áda rú kuyé rĩ, nẹbĩ 'dĩri índrí Múngú vé rĩ rụ' 'bá ni gé 'dǎáyo, ĩri ārí' 'bá Kúrísítõ vé ni. ĩmi yĩkĩ rá 'yozú kĩnĩ, ārí' 'bágú Kúrísítõ vé rĩ ri ímú 'dĩ' 'dĩ, nóni ícá gĩ, ĩri vũ drĩgé nōgónõ.

⁴ Má anji rĩ, ĩmi anji Múngú vé ni, ĩmi ndēkĩ nẹbĩ ũnjõ rú 'dĩ' 'bée gĩ, ā' 'diātāsīyā Índrí ẹzĩ ngaápi ĩmĩ rụ' 'bá gá rĩ, ũkpõ ni aga índrí ẹzĩ ngaápi nyõókú drĩgé nōgó rĩ vé rĩ rá.

⁵ 'Bá ũnjõ rú 'dĩ' 'bée, kôpi 'bá Múngú ri nĩ' 'bá kuyé ni pi, kôpi ri tã nyõókú nōri vé rĩ átá, 'bá Múngú ri nĩ' 'bá ku rĩ pi ri kôpivé tã 'dụ ẹzĩ ngazú.

⁶ 'Bá 'bá Múngú vé ni. Tã 'bá ní ícózú Índrí tã áda átápi rĩ nĩzú, āzini índrí ũnjõ rú rĩ nĩzú ámázú rĩ, ĩri 'dĩni, 'bá Múngú ri nĩ' 'bá rá rĩ pi, kôpi 'bávé tã 'dụ ẹzĩ ngazú rá, 'bo 'bá Múngú ri nĩ' 'bá ku rĩ pi, ícókĩ 'bávé tã 'dụ ẹzĩ ngazú ku.

Lēngará Múngú vé rĩ

⁷ ĩmi mávé ũndĩ má ní lēlē rĩ pi, lē 'bá lēkĩ 'bá lēlē, ā' 'diātāsīyā lēngará íbĩ íngá Múngú vúgá. 'Bá lēkĩ dõ 'bá lēlē, ĩri lũ 'yozú kĩnĩ, 'bá anji Múngú vé ni, 'bá nĩkĩ Múngú ri rá.

⁸ 'Bá āngũ lēpi ku rĩ nĩ Múngú ri kuyé, ā' 'diātāsīyā Múngú ri 'bá āngũ lēpi lēlē ni.

9 Múngú i'da ívé lēngará 'bá ní lētī be 'dínī, ĩpē ívé Mv́á ālukútaṅá rī nyōṓkú drīgē nōgó, 'bá ĩsúkí rí ídri 'dání'dání rī āní bēnī.

10 Lēngará agaápi rá rī, ĩri 'dínī, Múngú lē 'bá lēlē, ĩpē ívé Mv́á ímú drāá rōbōṅṅó rú 'bá trūzú 'bávé ũnjīkānyā agásī, adri 'yozú kínī, 'bá lēkí Múngú ri nī 'dínī kuyé.

11 Īmi mávé ũndī má ní lēlé rī pi, sū Múngú ní 'bá lēlé rī tīni, lē 'bá lēkí 'bá lēlē.

12 'Bá āzi ndre Múngú ri āluṅáni kuyé. 'Bo 'bá lēkí dō 'bá lēlē, Múngú ri adri 'bá agá, ádarú lēngará Múngú ní 'bá lēzú rī, 'bá 'bā ku 'bá ẹsī agá.

13 Múngú sē 'bá ní ívé Índrī Uleterē rī gí, sēzú 'bá ní nīzú ámázú āní, 'bá adri ĩri agá, ĩri adri 'bá agá.

14 Ẹtẹpī ĩpē ívé Mv́á ímú 'bá rī pi paá ĩvé ũnjīkānyā agásī. 'Bá ndrekí Mv́á rī 'bá mī sī rá, 'bá ní nóni rīí ĩrivé tā ũlūú 'bá vū drīgē rī pi ní 'dī.

15 'Bá rī ẹ'yī dō kīnī, Yẹsū ri Mv́á Múngú vé ni, Múngú ri adri ĩri agá, ĩri kpá adri Múngú agá.

16 Ádarú 'bá nīkí rá 'yozú kínī, Múngú lē 'bá lēlē. 'Bá ri ẹsī 'bā Múngú drīgē, ĩri ní 'bá lēé agaá rá rī sī.

Múngú lē 'bá rī pi lēlē. 'Bá rī lē dō 'í ógúpī ri lēlē, ĩri adri Múngú agá, Múngú ri adri ĩri agá.

17 Ádarú 'bá lēkí dō 'bá lēlē, sū Kúrísítō ní āngū lēé vū drīgē nōgó rī tīni, 'bá ícókí adrií ụ'dú Múngú ní ímúzú tā lịzú 'bá rī pi drīgē 'dāri sī ụrī sī ku.

18 'Bá āngũ lēēpi lēlē rī, ícò adrií Múngú sī ũrī sī ku. 'Bá ní ũsũú 'yoó kínī, Múngú ri 'bâ ĩrĩñã rá rī sī, ĩri sē 'bâ adri ānī ũrī sī. 'Dĩri lũ kínī, 'bá ũrī ní fíí ẹsị ni agá rī, lēngárá Múngú vé rī ẹsị ni agá 'dǎáyo.

19 Múngú ní í'dó 'bâ lēē drīdrī rī sī, sē 'bâ ri 'bâ lēlē 'bâ āsámvú gé sī ānī.

20 'Bá rī 'yo dō 'í lē Múngú ri rá, 'bo ĩri dō ri ẹsị ũnjí 'bã ẹdrípì ní, ĩri ũnjó rú. 'Bá 'í ẹdrípì 'í ní ndreé rá rī lēēpi ku rī, ícò Múngú ĩ ní rú' 'bá ni ndreé ku 'dǎri lēē ku.

21 Tǎĩmbị Múngú ní ẹzịí 'bá ní rī ĩri 'dĩni, lē 'bâ lēkí 'i lēlē, āzini 'bâ lēkí 'bâ ọgũpìì lēlē.

5

Lē 'bâ ẹ'yĩkí Múngú Mvọpì ri

1 'Bá Yésũ ri ẹ'yĩ' 'bá 'yo' 'bá kínī, Yésũ ri Kúrísítò 'i rī pì, 'bá 'dĩ' 'bée anjì Múngú vé ni, 'bá Múngú ri lē' 'bá lēlē rī pì, lēkí kpá anjì Múngú vé rī pì lēlē.

2 'Bá lēkí dō Múngú ri lēlē, āzini 'bá 'dụkí dō tǎĩmbị ĩrivé rī pì ngaá rá, 'bá nĩkí rá, 'bâ anjì Múngú vé rī pì lēlē.

3 'Bá 'dụkí dō tǎĩmbị Múngú vé rī ngaá rá, ĩri lũ 'yozú kínī, 'bá lēkí Múngú ri lēlē. Tǎĩmbị ĩrivé rī ã ngangárá adri ũkpó ũkpó ku,

4 ã'diātāsīyā anjì Múngú vé rī pì ũkpó be, kọpì tǎ ũnjí 'bá nyọọkú drīgé nōgó rī pì ní 'oó rī gā sī. 'Bá ní Yésũ ri ẹ'yĩí gí rī sī, 'bâ ícò tǎ ũnjí nyọọkú nōri vé rī gā sī.

⁵ 'Bá Yēsũ ri ẽ'yĩ'bá gí, 'yo'bá kínĩ, Yēsũ ri Mvá Múngú vé ni rĩ, kòpi 'bá tã ũnjí nyõõkú nõri vé rĩ pi gã'bá sĩ rĩ.

⁶ Tã lūupi kínĩ, Yēsũ Kúrísítõ ri Mvá Múngú vé ni rĩ, ĩri tã ĩ ní Yēsũ ní bătízĩmũ sězú yĩ agá rĩ, āzini ārí raápi rú'bá ni gé sĩ peṭi alambaku sígé rĩ. Adri 'yéná yĩ kuyé, ĩri yĩ, āzini ārí raápi rú'bá ni gé sĩ rĩ. Índrí Uleterere rĩ lū tã 'dĩri nĩ, ā'diātāsīyā tã Índrí Uleterere rĩ ní lūú rĩ, ĩri tã áda.

⁷ Ngá tã rĩ ẽ mĩ lūupi rĩ pi ngá na.

⁸ Ngá rĩ pi 'dĩ, Índrí Uleterere, yĩ, āzini ārí. Ngá na 'dĩ'bée, kòpivé tã ru 'i ngá ālu.

⁹ 'Bá rĩ pi kádõ rií 'bá ní tã átá, 'bá ri ẽ'yĩ rá, 'bo tã Múngú ní átá rĩ ndē 'bá rĩ pi ní átá rĩ rá, ā'diātāsīyā Múngú átá tã rĩ nĩ, átá tã 'i Mvõpi vé rĩ.

¹⁰ 'Bá Mvá Múngú vé rĩ ẽ'yĩpi rá rĩ, ẽ'yĩ tã Múngú ní átá rĩ rá. 'Bo 'bá tã Múngú ní átá 'i Mvõpi ā tã sĩ rĩ ẽ'yĩpi ku rĩ, 'bá 'dĩri kínĩ, Múngú ri ũnjó rú, ā'diātāsīyā ẽ'yĩ tã Múngú ní átá 'i Mvõpi vé tã sĩ rĩ kuyé.

¹¹ Múngú 'yo 'dĩni kínĩ, 'i sē 'bá ní ídri 'dáni'dáni rĩ gí, ídri 'dĩri íbí íngá 'i Mvõpi vúgá.

¹² 'Bá rĩ ẽ'yĩ dõ Múngú Mvõpi ri rá, ĩri ídri 'dáni'dáni rĩ ísú rá. 'Bo 'bá rĩ ẽ'yĩ dõ Mvõpi ri kuyé, ísú ídri 'dáni'dáni rĩ ku.

Ídri 'dáni'dáni rĩ vé ísúngará

¹³ ĩmi 'bá Múngú Mvõpi ri ẽ'yĩ'bá gí 'dĩ'bée, á sĩ kòkòbĩ 'dĩri sēé ĩmi ní, ĩmi nĩkí rí 'yozú kínĩ, ĩmi ídri 'dáni'dáni rĩ ísú rá.

14 'Bá nĭkí áamá múké múké, 'bá zĭkí dō ngá Múngú vúgá, tã ni 'de dō ẹsĭ ni gé 'dãá múké, ĩri ícó ngá 'bá ní zĭj rĭ sĕ 'bá ní rá.

15 'Bá nĭkí dō 'yozú kĭnĭ, 'bá kãdō ngá zĭj Múngú vúgá, ĩri sĕ 'bá ní rá, ádarú ngá 'bá ní zĭj rĭ, Múngú ri sĕ 'bá ní rá.

16 'Bá rĭ ndre dō ọgúpĭ Yĕsũ ri ẹ'yĭpĭ gĭ ni 'o ũnjĭkãnyã, ũnjĭkãnyã ĩri ní 'oó rĭ ícó dō ĩri jĭj fĭ ĩzãngã deępĭ ku 'dãri agá ku, mi ícó Múngú ri zĭ ĩri ní rá, 'bá mí ní Múngú ri zĭj ĩri ní 'dĭri, ĩri ícó ídri 'dáni'dáni rĭ ĩsú rá. ũnjĭkãnyã uruķo'bée ãngũ jĭ fi ĩzãngã deępĭ ku 'dãri agá, á 'yo 'yozú kĭnĭ, mĭ zĭ Múngú ri 'bá ũnjĭkãnyã 'oópi 'dĭri tĭnĭ rĭ ní kuyé.

17 Tã 'bá ní rií 'oó ũnjĭ ũnjĭ rĭ pi céré ũnjĭkãnyã, 'bo ũnjĭkãnyã uruķo'bée anigé, 'bá rĭ ícó fĭj ãní ĩzãngã deępĭ ku 'dãri agá ku.

18 'Bá nĭkí áamá rá 'yozú kĭnĭ, anji Múngú vé rĭ pi 'okí ũnjĭkãnyã mužú dĭj dĭj ku, ã'diãtãsiyã Mvá Múngú vé rĭ ri kọpi ütē nĭ, ãdróko ícó kọpi 'oó ũnjĭ ku.

19 'Bá nĭkí rá 'bã anji Múngú vé ni, 'bo 'bá Múngú ri ẹ'yĭ'bá ku rĭ pi ãrĕvú céré, ãdróko ọrú kọpi ẹ drĭ gĭ.

20 'Bá nĭkí rá 'yozú kĭnĭ, Mvá Múngú vé rĭ ícá vũ drĭgé nōgó gĭ, sĕ 'bá nĭkí Múngú áda rĭ áamá ãní gĭ, sĕ nóni 'bá adrikí kuú Múngú áda rĭ agá, ãzini ĩrivé Mvá Yĕsũ Kúrísítō agá. Múngú 'dĭri Múngú áda rĭ, ãzini ĩri Múngú ídri 'dáni'dáni rĭ sĕepĭ rĭ.

21 Má anji rĭ, ĩmi ndrekí múké, ẹ ĩnjĭkí ngá ĩ ní údé múngú rú rĭ pi ku.

Keliko

Keliko: Ụ'dụkọ Múké Múngú vé rị New Testament+
copyright © 2017 Wycliffe Bible Translators, Inc.

Language: Keliko

Contributor: Wycliffe Bible Translators, Inc.

All rights reserved.

2025-05-06

PDF generated using Haiola and XeLaTeX on 6 May 2025 from source files
dated 6 May 2025

14717198-957a-524c-b31f-2c3197945b20